



CENTRALE BANK VAN ARUBA

Entrante 1 di februari 2024, BCA ta mantene e tasa di reserva obligatorio na 22,0 por ciento.

Relato di prensa

Conforme e tarea di e Comité di Maneho Monetario (CMM) pa evalua, determina y duna transparencia riba e accionnan di maneho monetario di Banco Central di Aruba (BCA), BCA ta comunica lo siguiente. Durante e reunion di 29 di Januari 2024, CMM a dicidi pa mantene e tasa di e reserva obligatorio na 22,0 por ciento entrante 1 di februari 2024. Di e manera aki, e banconan comercial mester tene un balansa minimo na BCA cu ta igual na 22,0 por ciento di e depositonan riba termino cortico di nan clientenan. E decision pa reduci e tasa di reserva obligatorio ta basa primordialmente riba e reservanan oficial cu ta yegando serca di e limite minimo di e ARA, apesar cu tanto e reservanan oficial como e reservanan internacional a keda adecua y ta premira pa permanece asina durante 2024. Adicionalmente, likides excesivo di e sector bancario ta muestra un tendencia ascendente durante e ultimo lunanan. Finalmente ta considera prudente di mantene e reserva obligatorio na su nivel actual, mirando crecimiento continuo di credito y su efecto potencial riba reservanan internacional. BCA ta sigui monitorea e desaroyo den e reservanan y likides excesivo y lo por dicidi di cambia e tasa di reserva obligatorio, si ta considera esaki necesario.


E CMM a considera e siguiente informacion y analisis den su deliberacion.

Reservanan internacional y oficial

E reservanan internacional, cu ta consisti di reservanan oficial di BCA y reservanan di divisa na e banconan comercial, a baha cu Afl. 207,8 miyon te cu 29 di december 2023, compara cu fin di december 2022 (Grafico 1). E reservanan oficial a disminui cu Afl. 173,7 miyon, mientras cu e reservanan na banconan comercial a baha cu Afl. 34,1 miyon. Consecuentemente, te cu 29 di december 2023, e reservanan oficial y internacional a suma Afl. 2.617,2 miyon y Afl. 3.033,5 miyon, respectivamente.

Sostene un nivel adecua di reservanan ta esencial pa mantene e tasa di cambio fiho entre e florin Arubano y e dollar Mericano. Teniendo cuenta cu esaki, apesar di e caida menciona anteriormente, reservanan internacional a keda ampliamente riba e requisito di tres luna di pago riba e cuenta coriente di e balansa di pago te cu 29 di december 2023. E pagonan riba e cuenta coriente di e balansa di pago ta consisti, entre otro, di pagonan pa importacion, pagonan di dividendo na inversionistanan stranhero y transferencianan pa exterior manera placa manda afo door di trahadonan stranhero. Reservanan oficial tambe a keda dentro di e margen aceptabel basa riba e metrico 'Assessing Reserve Adequacy' (ARA) di e Fondo Monetario Internacional (FMI) (Tabel 1).

Grafico 1. Reserwanan oficial y internacional (incluyendo revaluacion)
(Fuente: CBA)



Tabel 1: Metriconan relata na reserwanan observa den 2023

	jan	feb	mrt	apr	mei	jun	jul	aug	sept	oct	nov	dec
Cobertura estima di pagonan riba cuenta coriente ¹	7,1	7,0	6,8	6,9	6,8	6,7	6,9	6,8	6,2	6,2	6,3	6,3
Metrico estima di FMI ARA ²	106,6	105,3	109,6	114,9	113,5	111,8	113,4	113,7	105,9	105,5	102,2	103,4

¹ E cantidad di luna di pagonan riba cuenta coriente cu e reserwanan internacional ta cubri.

² E proporción entre e nivel di reserwanan oficial y e nivel minimo adecua (conforme FMI), den por ciento.

Inflacion


Inflacion, midi na final di luna contra e mesun luna di e aña anterior, a yega 1,7 por ciento na november 2023 (Grafico 2). E contribuyentenan principal na e inflacion, midi na final di luna contra e mesun luna di e aña anterior, na november 2023, tabata 'comunicacion' (contribuyendo cu 1,5 punto di porcentahe), 'diferente producto y servicio' (contribuyendo cu 0,4 punto di porcentahe), y 'vivienda' (contribuyendo cu 0,4 punto di porcentahe). Di otro banda, e componente 'transporte' (contribuyendo cu -1,1 punto di porcentahe) a mitiga e inflacion den november 2023.

E inflacion midi riba promedio di 12 luna a baha pa 3,7 por ciento na november 2023; un caida compara cu 4,1 por ciento na oktober 2023. E presion inflacionario tabata mas tanto debi na e subida den e tarifa di awa y coriente desde

augustus 2022 y e aumento den prijs di cuminda y bebida no alcoholico. Ademas, Aruba a importa un gran parti di e crecimiento den prijs for di su partnernan comercial, particularmente Estados Unidos y Europa.

Mientrastanto, na november 2023, inflacion basico (cu ta exclui cuminda y energia) a alcanza 2,6 por ciento si midi e final di respectivo luna contra e mes un luna di e aña anterior (oktober 2023: 1,5 por ciento). Basa riba un promedio di e ultimo 12 lunanan, inflacion basico a yega na 1,9 por ciento (oktober 2023: 1,9 por ciento).


Grafico 2. Inflacion basa riba e indice di prijs di consumo
(Fuente: CBS, november 2023)



Likides excesivo di e banconan comercial

Likides excesivo di e banconan comercial (incluyendo credito cu no a wordo aloca ainda y otro compromisonan) tabata Afl. 440,7 miyon na november 2023, esta, Afl. 15,7 miyon menos compara cu oktober 2023 (Grafico 3). Ora cu compara cu fin di december 2022, likides excesivo ta refleha un contraccion di Afl. 379,1 miyon. E caida aki tabata principalmente debi na refinanciamiento di fiansanan internacional riba mercado local y compra di bono di gobierno pa inversionistanan institucional. Mientrastanto, un calculacion preliminar di e likidez excesivo ta sugeri un subida di Afl. 141,9 miyon te cu december 29, 2023 compara cu november 30, 2023.

Grafico 3: Likides excesivo di banconan comercial
(Fuente: CBA)



— Likides excesivo — Likides excesivo (nivel di cautela) — Likides excesivo, kitando prestamonan no distribui y otro compromisonan

Banco Central di Aruba
14 di maart 2024